



DETG DENTER NUS

MAGAZIN UFFICIAL DALLA VISCHNAUNCA DA DISENTIS/MUSTÉR

02/2025



Bien quen communal

4/5

Golden Card – nova purschida pils indigens

6/7

Sanaziun dallas vias a Ragisch e Cons

8–11

Ina maschina nova pil menaschi tecnic

12/13

Eveniments passai en vischnaunca

14/15

Kurz und bündig – es läuft einiges

Die Gemeinde Disentis/Mustér blickt auf ein gutes Geschäftsjahr 2024 zurück. Die Gemeinderrechnung schliesst mit einem Gewinn von rund 250'000 Franken ab. Der Cashflow beläuft sich auf 3,15 Millionen Franken. Die Gemeinde hat Investitionen in Höhe von 1,54 Millionen Franken getätigt. Für die Sanierung und Erweiterung der Kläranlage wurde eine Reserve von zwei Millionen Franken gebildet. S. 4/5.

Die Gemeinden Disentis/Mustér, Tujetsch, Andermatt, Realp und Hospenthal haben eine neue Karte für die einheimische Bevölkerung, die Golden Card, geschaffen. Nach Erwerb der kostengünstigen Karte können alle Personen, die in einer dieser Gemeinden wohnhaft und steuerpflichtig sind, kostenlos von einem breiten Angebot Gebrauch machen. S. 6/7.

Im Verlaufe dieses Jahres wird die Via Ragisch in Mumpé Medel saniert. Die Kosten dafür belaufen sich auf 421'000 Franken. An der Investition beteiligt sich der Bund (VBS), zudem gibt es einen Beitrag im Sinne der Verbesserung der landwirtschaftlichen Strukturen. Somit verbleibt der Gemeinde eine zu finanzierende Summe von 151'175 Franken. S. 8.

Am 28. September 2025 entscheidet das Stimmvolk über die Sanierung der Via Cons. Die Gemeinde hat eine neue Variante ausgearbeitet, nachdem die erste Variante in der Urnenabstimmung vom 14. April 2024 abgelehnt wurde. S. 9–11.

Der Gemeinderat hat einen Kredit von 280'000 Franken für den Kauf eines neuen Kommunalfahrzeugs bewilligt. Es handelt sich um eine Maschine des Typs Meili M7000 Urs. S. 12/13.

In den letzten Wochen und Monaten fanden in Disentis verschiedene Anlässe statt. So feierten die Movis das 25-jährige Jubiläum. Ein Film von Norbert Levy aus dem Jahr 1975 zeigte die prekären Schneebedingungen jenes Winters im Skigebiet in Disentis. Zum Start der neuen Mountainbike-Saison stellte sich das Team Thömus Maxon im Catrina Resort vor. Dem Team gehört unter anderem Alessandra Keller an, eine der weltbesten Mountainbikerinnen. S. 14/15.

In der Rubrik «Unser Personal» stellt sich Carmen Wetzler aus der Gemeindeverwaltung vor. Der Turnverein Disentis gibt Einblick in sein Angebot und seine Ziele. S. 16/17.

Temps d'avertura dall'administrasiun communal

Valeivel per tuts uffecis en casa communal

Spurtegl

Gliendisdis	08.30–11.30	15.00–18.30
Mardis–gievgia	serrau	15.00–17.30
Venderdis	07.30–14.00	serrau

Telefon

Gliendisdis–gievgia	08.00–12.00	13.30–17.00
Venderdis	07.30–14.00	serrau

Igl access en casa communal e l'investa els documents exponi publicamein ein pusseivels durant las uras d'avertura dil spurtegl. Uteriur sclariment durant las uras da telefon 081 920 36 36.

Ediziun digitala



Instagram



Facebook



Impressum

Editur

Vischnaunca Disentis/Mustér
Via Cons 2, Caum postal 57
7180 Disentis/Mustér
detgdenternus@disentis.ch

Redacziun

René Epp, Roland Cajacob, Hans Huonder

Fotografia sill'emprema pagina cuviarta

Mess a disposiziun Movis

Ediziun

1250 exemplars
Cumpara mintga quartal

Layout e grafica

Iuna:mediadesign GmbH,
Via Principala 36, 7166 Trun

Stampat

Stamparia La Tuatschina,
Via Alpsu 62, 7188 Sedrun

Sco lavur da team sa menar a success e cuntentientscha

Buna collaboraziun ei in dils facturs centrals per haver success tier projects, per haver teams motivai, in summa per haver success persistent. Quei pertucca buca mo igl ambient da lavur, mobein era il mintgadi, seigi quei culla famiglia, en scola ni en uniuns. Collaboraziun munta denton aunc bia dapli che luvrar ensemen vid ils medems pensums. Ina buna collaboraziun pretenda ina coordinaziun da finamiras, resursas e da habilitads. Quellas vegnan pridas ensemen en in team per contonscher communablamein la medem'intenziun. En in mund globalisau e colligiau ei la habilitad da collaborar en in team numnadamein daventada ina cumpetenzza da clav. Grondas fatschentas che han success, sco Google ni Apple, dattan peisa cunzun alla forza da buns teams, per promover innovaziun e per sligar sfidas complexas. Ils pli impurtants avantatgs d'ina buna collaboraziun en in team ein:

- **Augment dalla productivitat:** Sche persunas en in team lavuran fetg effectiv sa mintgina, cun sias fermezas individulas, contribuir sia part al success. Il medem mument san fleivlezas vegnir ulivadas. Quei meina tier dapli efficienza e megliers resultats. La repartiziun da lavur vegn pli clara, lavur dubla vegn evitada e las resursas vegnan nezegiadas optimalmeins.
- **Promoziun da creativitat ed innovaziun:** La diversitad en in team, seigi quei en connex cullas atgnas experientschas ni habilitads, animescha adina puspei danovamein da reflectar il process. Entras il brat da differentas ideas neschan bia ga soluziuns innovativas, las qualas havessen ins buca contonschiu persuls.
- **Migliurar la cuntentientscha ella lavur:** In ambient da lavur harmonic, nua ch'ins segida in cun l'auter el team, contribuescha considerablamein d'esser pli cuntents. Ei vegn creau in sentiment d'esser ina part dil project ni dalla lavur, quei che reducescha la fin finala stress e promova igl engaschi. Persunas cuntentas ein bia ga bia pli productivas e darar malsaunas.
- **Dapli confidanza e respect:** Ina buna collaboraziun sebas sin confidanza e respect. Quellas valurs promovon buca mo in clima da lavur positiv, mobein era la promptadad da sligar conflicts constructivamein e cunzun da s'engaschar comunablamein per las medemas finamiras.



Exempels concrets dalla pratica

- **Transformaziun communal:** Entras la reorganizaziun communal han ils differentes teams dalla vischnaunca survegniu dapli responsablada e dapli cumpetenzas finanzialas. Els teams san las differentas persunas sebrattar, segidar e substituir ina l'autra. Ils effects dalla buna, efficiente ed interessanta collaboraziun els teams ein positivs e meinan als avantatgs suranumai.
- **Golden Card:** Senza ina buna collaboraziun denter las duas vischnauncas da Mustér e Tujetsch, las pendicularas da Mustér e Sedrun/Andermatt, las vischnauncas e las pendicularas e senza ina buna collaboraziun culs responsabels dils ulteriurs purtaders da prestaziuns ella Golden Card, fuss quella carta unica ussa buca sin meisa. Mo ensemen e cun finamiras comunablas eisi stau pusseivel da crear in product aschi innovativ e progressiv. Tuts han tratg vid il medem sughet. Mo aschia san ideas vegnir realitad.

Facit

Il dictat sulet d'ina persuna, glorificaziun da sesez e tertgar ch'ins sappi sez tut meglier – ina aschinumada «one-man-show» – s'auda definitiva-mein tiel vargau. Las valurs ein semidadas evidentamein. Gie, la buna collaboraziun ei la clav tiel success. Luvrar en teams e profitar in da l'auter ei la necessitad actuala. La collaboraziun augmenta la fin finala buca mo la productivitat, mobein era la cuntentientscha e l'unitad.

René Epp, president communal

Onn 2024 cun bien quen

Mesjamna, ils 30 d'avrel 2025 ha il cussegl da vischnaunca approbau il quen annual 2024. La suprastanza communal ha saviu presentar in fetg bien quen cun in'atgna finanziaziun (cash-flow) da 3,15 milliuns francs ed investiziuns da netto 1,54 milliuns francs. Suenten in deposit da dus milliuns francs ella prefinanziaziun dalla sanaziun ed engrondaziun dalla serenera ed ulteriurs deposits per la promoziun dil svilup dil liug e per il spazi da habitar per indigens ei restau in gudogn da 249'425 francs.


Il quen annual 2024 dalla vischnaunca da Mustér ei era uonn fetg buns. La suprastanza communal ha saviu presentar in quen cun grond avanzament en cumparegliaziun cul preventiv. Il fetg bien resultat ei en emprema lingia d'attribuir alla vendita d'energia ed als tscheins d'aua. La raschun per quellas entradas extraordinarias ei stada l'aula producziun d'energia elettrica entras plievngias e bia neiv els aults la primavera 2024. Era entginas entradas da taglia, surtut la taglia sin gudogn da schischom, ein pli aultas che budgetadas. Quellas posiziuns han grond'influenza sil quen annual ed ein buca semplas da planisar. Da l'autra vart ein ils cuosts pil provediment da sanadad aults.

Igl onn 2024 ei vegniu investau netto rodund 1,5 milliuns francs. En cumparegliaziun cul preventiv ei

il quen d'investiziun pli bass. Entginas investiziuns previdas han buca saviu vegnir exequidas damai ch'ellas ein vegnidas refusadas alla votaziun all'urna (Via Cons) ni ch'ellas han giu retard tier las proceduras preparatorias.

Sco gia ils davos treis onns ei l'atgna finanziaziun cun 3,15 milliuns francs era uonn fetg buna. A liunga vesta ei in'atgna finanziaziun da dus entochen treis milliuns la finamira dalla suprastanza communal. Per contonscher quella finamira ston ulteriuras entradas vegnir generadas. Persuenter basegna ei svilup ed activitad. Svilup munta investiziuns. Medemamein duei denton era vegnir garantiu in bien service public alla populaziun.

Il fetg bien resultat dil quen 2024 dat la pusseivladad da far gia uonn in deposit da dus milliuns francs sco prefinanziaziun per la sanaziun ed engrondaziun dalla serenera. Quella prefinanziaziun vegn a descargar ils quens annuals vegnents. Ultra da quei ei vegniu augmentau il fond per spazi da habitar per indigens per 100'000 francs e creau in niev fond pil svilup local (Standortförderung) cun ina summa da 255'000 francs. Quei fond stat a disposiziun en emprema lingia per la nova carta per indigens ch'ei vegnida in-stradada il zercladur 2025.





Igl onn 2024 ha la vischnaunca fatg in gudogn da rodund 250'000 francs. Foto Hans Huonder

Survesta dallas cefras indicativas

	Quen 2024	Preventiv 2024	Quen 2023
Atgna finanziaziun	frs. 3'153'650	frs. 817'000	frs. 2'669'258
Grad d'atgna finanziaziun	205.30 %	11.09 %	66.33 %
Quota d'atgna finanziaziun	16.80 %	4.96 %	15.59 %

Atgna finanziaziun

Tier l’atgna finanziaziun (cash-flow) setracta ei dad in’impurtonta cefra da clav. Pli aulta che l’atgna finanziaziun ei e pli grondas che las investiziuns che san vegnir fatgas cun agens mieds – pia senza prender si credits jasters – san esser. Igl onn 2024 ei l’atgna finanziaziun s’augmentada aunc ina ga visavi quella digl onn 2023 ed ei aschia la pli aulta dils davos diesch onns.

Ils quens annuals dils davos onns ein stai fetg buns. Quei ei d’attribuir surtut allas entradas extraordina-

rias ord la vendita d’energia, muort l’altezia dil prezi ni muort ina producziun pli aulta, quei che muossa denton era la dependenza da quellas entradas ch’ein la fin finala fetg volatilas. Da l’autra vart havein nus era cuosts ch’ein s’avanzai marcantamein ils davos onns. Cheu ei surtut da numnar ils cuosts el sector da sanadad cun las casas d’attempai ni da tgira, il spital regional ni era la spitex. Nus sperein da saver mantener era ils proxims onns in equilibr positiv denter cuosts ed entradas.

Suprastonza communal

Golden Card – la nova carta per persunas indigenas

Sin iniziativa dallas vischnauncas da Tujetsch e Mustér han las vischnauncas da Tujetsch, Mustér, Andermatt, Realp e Hospental instradau ensemen la Golden Card: In abbonament digl onn per persunas indigenas cun access a numerusas purschidas dil temps liber, sport e cultura ella regiun. Quei succeda per in prezi fetg reduciù. La carta ei ina part dalla strategia da svilup dalla regiun Andermatt-Sedrun-Mustér e duess rinforzar a liunga vosta l'attrattività da viver ella regiun. La realisaziun dalla purschida ei stada pusseivla grazia al grond sustegn dallas duas societads da pendicularas Andermatt-Sedrun Sport AG e Pendicularas Mustér SA.

La Golden Card porscha a persunas indigenas cun domicil da habitar e da taglia en ina dallas vischnauncas da Tujetsch, Disentis/Mustér, Andermatt, Realp e Hospental access a numerusas purschidas dil temps liber, sport e cultura ella regiun.

La possessura ni il possessur dalla Golden Card ha access liber a:

- Pendicularas Andermatt-Sedrun Sport AG (ASS) e Pendicularas Mustér SA (BBD) igl entir onn
- Mo igl unviern Viafier Matterhorn Gottard denter Mustér ed Andermatt
- Bogn cuvretg el Bogn Sedrun
- Wellness el Bogn Sedrun
- Fitness Center Fontauna Mustér
- Halla da reiver Center Fontauna Mustér
- Badminton Center Fontauna Mustér
- Minigolf Center Fontauna Mustér
- Tennis Center Fontauna Mustér
- Tennis a Sedrun
- Loipas da cuorsa liunga Val d'Ursera, Sedrun e Nordic Surselva
- Patineras ad Andermatt, Sedrun e Mustér
- Talmuseum Ursern
- Museum dalla Clastra Mustér
- Museum Cristallina Mustér
- Museum La Truaisch Sedrun
- Bus locals a Val d'Ursera, Sedrun e Mustér
- Driving-Range Club da golf Sedrun

Prezis per la Golden Card

Carschi naven dil 16avel onn	frs. 333.–
Affons 6–15 onns	frs. 33.–
Affons entochen 5 onns	gratuit

Per affons sut 6 onns ei la carta gratuita, tuttina fa ei da basegns ch'els possedan ina carta. La Golden Card ei persunala e buca transferibla.



Dapli informaziuns davart la Golden Card ed ina collecziun da damondas e rispostas ein d'anflar sut www.goldencard-asd.ch.

Suprastonza communal





Ina part dalla Golden Card ei era il nez gratuit dils territoris da skis d'Andermatt, Sedrun e Mustér.

Foto Sedrun Mustér Turissem

Retrer la Golden Card:

La carta sa vegnir retratga alla cassa dallas Pendicularas Mustér SA cun presentar ina confirmaziun da domicil.

Confirmar il domicil:

Per saver retrer la carta ei ina confirmaziun da domicil per tuttas personas necessaria (era per affons). Quella confirmaziun ei disponibla al spurtegl dalla vischnaunca ni online sur la pagina d'internet www.disentis.ch/golden-card.

Valeivel:

La Golden Card ei valeivla mintgamai naven digl 1. da zercladur entochen ils 31 da matg digl onn suandont.

Abonnements:

Abonnements gia existents pil Center Fontauna ni pil Bogn Sedrun vegnan restitui pro rata. Fagei aschi bien e s'annunziei tiel Center Fontauna ni tier la vischnaunca da Mustér per abonnements dil Center Fontauna ni tier il Bogn Sedrun per abonnements dil bogn.

La Via Ragisch a Mumpé Medel vegn renovada



La Via Ragisch a Mumpé Medel ha da basegns d'ina sanaziun. Foto Vischnaunca Disentis/Mustér

En sia seduta dils 30 d'avrel 2025 ha il cussegl da vischnaunca concediu in credit da 155'000 francs per la sanaziun dalla Via Ragisch a Mumpé Medel. La Via Ragisch ei vegnida cedida igl uost 2023 dalla confederaziun alla vischnaunca da Mustér. L'inventarisaziun dil stan dalla via ha mussau ch'ina renovaziun ei necessaria. Damai ch'il departament federal VBS ha attestau tier la scumiada da maun da separticipar vid la sanaziun dalla via, ei vegniu decidiu da realisar la renovaziun gia igl onn 2025 sin basa dil project preliminar.

La Via Ragisch che sesanfla silla parcella nr. 2356 ei vegnida cedida igl uost 2023 dalla confederaziun alla vischnaunca da Mustér. Igl onn 2022 ei il stan da quella vegnius inventarisaus. Il medem mument ein ils basegns da renovaziun vegni registrai. Damai ch'il departament federal VBS (Departament federal per defensiun, protecziun civila e sport) ha attestau tier la midada da maun da separticipar vid la sanaziun dalla via, ei vegniu decidiu sin basa dil project preliminar da perseguitar vinavon il project e da preveder la renovaziun igl onn 2025.

La cuvrada da catram ha per part fermas fessas e vials cun bia zercllem. Dalla vart su dalla via sesanflan mirs da sustegn e canasters da crappa che san vegnir manteni. Dalla vart a val existan sin ina lunghezia da ca. 20 meters canasters da crappa che ston vegnir remplazzai. La via ha ina ladezia da 2,80 entochen 3,00 meters. Las banchinas existentas han mo per part la ladezia necessaria da 50 cm. La via vegn renovada tenor las normas digl Uffeci d'agricultura e geoinformaziun cantunal (ALG).

Il plan d'investiziun per 2025 cuntegn la summa da 262'000 francs per la renovaziun dalla Via Ragisch. La renovaziun dalla Via Ragisch sa vegnir taxada sco mesira comunabla tenor l'ordinaziun davart la meglieraziun da structurass ell'agricultura e vegn aschia sustenida finanziamein cun credits d'agricultura. La cumpart dil departament federal VBS munta a maximal 133'000 francs.

Survesta dalla finanziaziun:

Cuosts totals tenor calcul da cuosts:	frs. 421'000.–
Contribuziun departament VBS	frs. 133'000.–
Subvenziuns dall'interessenza agricola	frs. 136'825.–
Total cuosts restonts	frs. 151'175.–

La contribuziun finanziaria dil departament VBS ei ligiada vid la pretensiun che las lavurs vegnien terminadas la fin digl onn 2025. Consequentamein ei previu suandont plan da terms:

Surdada dallas lavurs d'impressari	matg 2025
Entschatta dallas lavurs da construcziun	
	naven da miez zercladur 2025
Fin dallas lavurs	fin october 2025

Las contribuziuns davart il departament VBS sco era davart igl Uffeci cantunal d'agricultura e geoinformaziun ALG ein optimalas. Ina sanaziun dalla via segirescha all'agricultura a liunga vesta la cultivaziun dil terren el contuorn da Ragisch. Ultra da quei profitescha la cava da scalegl, il museum dalla fortezia e tut ils utilisaders dalla punt La Pendentia digl access sur la Via Ragisch.

Suprastonza communal

Project surluvrau per la sanaziun dalla Via Cons


Igl onn 2024 ha il suveran da Mustér renviu il credit per la sanaziun dalla Via Cons. Sinaquei ei il project vegnius surluvraus ed adaptaus. Mardis, ils 27 da matg 2025 ha il cussegl da vischnaunca dau suatientscha alla damonda da credit pil project surluvrau. La sanaziun preveda da salvar la lingia dalla Via Cons sco era ils parcadis el medem liug sco tochen dacheu. Per reducir la spertadad dil traffic vegn construì ina restrenschida dil vial sill'altezia dall'entrada dalla baselgia. La fundaziun dalla via vegn renovada ed era la canalisaziun/deflussiun vegn remplazzada.

Suenter ch'il suveran ha renviu ils 14 d'avrel 2024 la proposta dil cussegl da vischnaunca da conceder in credit da 1'849'000 francs per la sanaziun dalla Via Cons, ei la suprastanza communal ida ladinamein vid l'adattaziun dil project per tuttina aunc saver realisar quella sanaziun pli che urgenta. Quei surtut risguardond il fetg schliet stan dallas ovas cumpigliadas sutterraneas dalla Via Cons. La situaziun precara dalla canalisaziun ha consequenzas negativas ton pils baghetgs cunfinonts sco era pil tgierp dalla via. Quel ei vegnius deformaus e donnegiaus grevamein entras la canalisaziun defecta.

L'infrastructura dalla Via Cons ch'ei vegnida els onns ei exponida fermamein allas frequenzas intensivass. Ella survescha buca mo sco access primar als quartiers da Gonda, Dulezi e Cons, mobein era sco via da rimnada strategica. Ultra da quei vegn ella duvrada savens sco ruta alternativa ed utgida dallas vias principalas Via Alpsu e Via Lucmagn. Cheutras ei la via vegnida strapazzada considerablamein. La structura dalla via ei en in stan buca pli supportabel.

Il perimeter dalla sanaziun ei restrenschius silla Via Cons culs parcadis ed il passapei dalla vart dalla baselgia. Cun quei agir vegn la construcziun nova adattada al contuorn existent dalla baselgia (mir) respectiv al spazi avon casa da scola. Il parcadì vegn a restar el medem liug (vart plaz da scola). Per reducir la spertadad dil traffic vegn construì ina restrenschida dil vial sill'altezia dall'entrada dalla baselgia.

Sil tschancun denter la Via Sontga Gada entochen il Parcadi Aviul – sut la Halla Cons – ei previu las pli grondas midadas. La geometria directa da carrar denter la piazza da scola e la casa da tgira Puntreis resp. la baselgia parochiala vegn buca midada. Aschia sa




il giavisch da schar ils parcadis el medem liug vegnir adempliers. Els vegnan construi cun ina lunghezza da 5,50 meters, pia in surpli da 50 cm en cumparegliaziun culla lunghezza actuala. Ils pedunzs san far diever dils passapeis sco entochen dacheu.

Per garantir la segirtad el contuorn dalla baselgia parochiala e dil plaz da scola vegn la ladezia dil vial reducida sin 3,50 meters. Quei sin in lunghezza da ca. 12 meters.


Sil tschancun dalla Halla Cons entochen alla Via Lucmagn sco era naven dalla Via Alpsu entochen alla sbuccada dalla Via Sontga Gada resta la geometria dalla via medemamein pli u meins sco entochen dacheu.

Cuosts dil project

Ils cuosts dil project per la sanaziun dalla via, dallas canalisaziuns d'aua schubra e d'aua tschuffa, sco era l'illuminaziun publica muntan a total 1'798'000 francs. Quels secumponan ord la cumpart dalla sanaziun dalla via da 1'463'000 francs ed ord la cumpart dalla sanaziun dalla canalisaziun da 335'000 francs. Quella cumpart dalla canalisaziun ei part dalla finanziaziun



La Via Cons ei en in schliet stan. Foto Vischnaunca Disentis/Mustér



speciala ed il credit persunter ei gia vegnius approbaus dil cussegl da vischnaunca igl onn 2024. Aschia ha quei credit vinavon vigur legala ed ei buca staus part dalla damonda da credit al cussegl da vischnaunca ed era buca alla cuminonza da votantas e votants. El cass dalla Via Cons setracta ei dad in'avertura generala fundamentala che possibilitescha l'avertura buca mo d'in grond spazi public, mobein era a differents menaschis. Risguardond quei fatg ei la suprastanza communal vegnida tier la conclusiun da desister el cass dalla Via Cons cun sia funcziun da providiment centrala d'ina procedura da contribuziun.

A caschun dalla seduta dils 26 da matg 2025 ha il cussegl da vischnaunca concediu in credit da 1'463'000 francs per la sanaziun dalla Via Cons. Quella fatschent ei da suttametter tenor art. 32 lit. d dalla constituiun communal alla cuminonza da votantas e votants. La votaziun all'urna ha liug dumengia, ils 28 da settember 2025. Ils 22 d'uoost 2025 ha liug ina sera d'informaziun publica dalla vischnaunca davart differents tematicas. Denter auter vegn presentau lu alla populaziun il project «Sanaziun dalla Via Cons».

L'entira summa da credit duess vegnir investada el decuors dils onns 2026 e 2027.

Suprastanza communal



La lingia dalla Via Cons duei restar sco entochen dacheu.
 Foto Vischnaunca Disentis/Mustér

Ina maschina nova pil menaschi tecnic

La maschina actuala dil tip Meili VM7000 ei vegnida messa en funcziun la fin digl onn 2014. Dapi lu ha ella prestau biebein 5500 uras da lavur. Igl ei in'impurtanta maschina multifara che vegn duvrada igl entir onn per exequir las lavurs dil menaschi tecnic. Ussa sto la maschina existenta Meili vegnir remplazzada muort vegliadetgna.

Il transporter Meili VM 7000 ei ina maschina concepida per lavurs communalas e transports da material. Ella ei semplia da manischar (hidrostat) e grazia a sia ladezia dad 1,8 meters eis ei pusseivel da carrar cun ella sin vias ch'ei buca carrablas cun camiuns ni transporters pli lads. La maschina sa era vegnir duvrada sin differentas sendas. Pil survetsch d'unviern eis ei necessari da haver ina maschina che sa era carar atras las streglias, seigi quei a Disla, Clavaniev, Segnas ni era el vitg da Mustér. Il menaschi tecnic basegna era pil futur ina maschina dalla medema dimensiun. Las uras prestadas annualmein attestan il bien nez.


Sin fundament dil diever quotidian e las pretensiuns relevantas da segirtad seresultan las suandontas pretensiuns alla maschina:

- En general medem diever e pretensiuns sco la maschina existenta (adattaziun dil cundrez da stiarner sal existent, survir per da tuttas sorts transports, pusseivladad da pender vidlunder in carr annex, vehichel movibel ed adattaus a nossas vias stretgas (ladezia maximala da 1800 mm, tracziun da quater rodas).
- Pusseivladad da luvrar cun muldas per augmentar l'efficienza dallas lavurs e buca bloccar la maschina cun temps da spetga.
- Sempel enten segirar las cargas; augmentar la segirtad per transports da tut gener.
- Pil survetsch d'unviern duront il stiarner sal duei in criecl possibilidar da stiarner il sal direct sin via e buca ella neiv che vegn pli tard rumida. Aschia sa vegnir augmentau igl effect dil sal ed era reduciu l'immissiun dil sal pigl ambient.

L'acquisiziun dalla maschina succeda tenor las prescripziuns per incumbensaders publics. Per la furniziun ei la procedura libra stada d'applicar. Spel prezi ei era il criteri pil diever vegnius valetaus. Ord las treis offertas inoltradas (tuttas da fatschentas specialisadas d'ordeifer la vischnaunca) ei resultau, che la maschina Meili M7000 Urs dalla fatschenta Victor Meili AG ademplescha il meglier ils criteris dalla submissiun.



La maschina actuala dil tip Meili VM7000 vegn remplazzada d'ina dil tip Meili M7000 Urs. Foto Vischnaunca Disentis/Mustér



Il stiarnasal existent sa vegnir nezegiaus vinavon ed entras il sistem cun crutsch e muldas sa la segirtad per transports vegnir augmentada.
Il credit da 280'000 francs per la cumpra dalla maschin-a ei vegnius concedius dil cussegl da vischnaunca a caschun dalla seduta dils 30 d'avrel 2025.

Cun quella maschina nova ha il menaschi tecnic dalla vischnaunca segiramein ina soluziun cumprovada che garantisce in bein funcziunar pils proxims diesch onns.

Suprastonza communal



La maschina actuala ei en funcziun dapi varga diesch onns. Foto Vischnaunca Disentis/Mustér

Ils Movis han festivau il giubileum da 25 onns

100 saltunzas e saltunzs – pigns e gronds – giuvens e vegls – dils Movis han delectau il publicum l'entschatta avrel ella halla Cons. Igl ei stau las presentaziuns pil giubileum da 25 onns dils Movis. Il program da questa primavera ei staus aschidadir in viadi tras la historia musicala: In charleston dils onns 1920 entochen musica moderna. Leutier han las saltunzas ed ils saltunzs presentau interessantas coreografias. Quei han els fatg sut la direcziun da 12 mussadras.

Entschiet cun 15 affons

Entschiet ha la historia dils Movis cun 15 affons. Igl interess da saltar cun coreografias ei carschius successivamein e cun el il diember da gruppas. Il pli grond diember da participontas e participonts han ils Movis nudau igl onn 2020 cun 134 dels. Ils davos tschun onns ei igl interess sereducius, in dils motivs ei la digren da naschientschas. Tuttina setegn il diember d'affons, giuvnils e carschi che separticipeschan als Movis sin rodund 100, quei ch'ei aunc adina in grond success.

Midada al tgamun

Esther Hendry ch'ei stada confundatura dils Movis avon 25 onns e che ha menau quels dapi lu, ei sedecidida da surdar il tgamun en mauns pli giuvens. Ella resta fideivla als Movis sco mussadra. Dacuort ein las funcziuns da responsabladad vegnidas surdadas en ina seduta dils Movis per aschia saver garantir ina buna successiun e las preparativas pigl onn da sault 2025/26. La cuntinuitad dils Movis sco sparta dall'Uniun da gimnastica Cadi ei pia garantida. Quater dunnas giuvnas ella vegliadetgna da 20 e 30 onns ein sedeclaradas promtas da surprender las funcziuns da tgamun che Esther Hendry ha ademplier il davos 25 onns.



Presentaziun spectaculara d'ina dallas differentas gruppas.



Saltunzas e saltunzs sin tribuna alla fin dallas presentaziuns dall'entschatta avrel 2025.

Repartiu la responsabladad

Ana Castro Ferreira surpren il resort d'organisaziun dallas menadras, annunzias sco era repartiziun dallas gruppas e hallas; Margarida Matos ei responsabla per medias e tecnica; Romina Cajacob surpren il resort inventari/schefa da material e Jennifer Lozza segna responsabla per l'organisaziun dallas producciuns finalas. Las ulteriuras menadras restan sco tochen da cheu e segidan nua ch'igl ei pusseivel: Valeria Hendry, Nicole Scheuber, Helen Riedweg, Aurelia Albin, Anja Klittich, Flavia Deplazes ed Esther Hendry.

Hans Huonder



Il team responsabel per las presentaziuns dils Movis igl onn da sault 2024/25. Fotos Movis

Las pendicularas igl unviern 1974/75

Venderdis, ils 11 d'avrel 2025 ha La Culturella organisau ina sera da film el Center Fontauna. Ella ha mussau in film dil convischin Norbert Levy davart igl unviern 1974/75. Igl ei in document historic d'in unviern cun nevaglias. Pli che 100 persunas han gudiu il film che ha cuzzau rodund 40 minutas.

Igl avrel 1975 han las massas da neiv menau a situaziuns extraordinarias. Las nevaglias naven digl atun 1974 entochen igl avrel 1975 han procurau per lavinas, mo ellas han era caschunau bia lavur e fastedis el territori da skis da Mustér, surtut l'entschatta avrel ch'ei ha neviu nuninterruttamein plirs dis. Ensem cun Max Deplazes ha Norbert Levy commentau las frequenzas d'in film ch'el ha fatg gliez unviern el territori da Caischavedra entochen sisum il tierz runal.



Emploiau dallas pendicularas semtgau da sittar giu ina lavina.



Il runal il pli sisum dil territori da skis dallas Pendicularas Mustér SA menava all'entschatta dalla val siadora.

Fotos ord il film da Norbert Levy

In tschuppel persunas ch'ei da vaser sil film ein stadas presentas quella sera ella Sala Cuflons dil Center Fontauna, mo era glieud che saveva aunc seregurdar bein da quei unviern. In interessant film eis ei denton era stau pils affons presents che han aschia saviu guder l'atmosfera d'avon in miez tschentanter el territori da skis. Aschia per exempel ils tips da maschinas che vegnevan lu en funcziun ni era la lavur vid ils indrezs technics. Il president da La Culturella, Flavio Murer, ha menau atras la sera.

Hans Huonder

Team Thömus Maxon ei sepresenta a Mustér



Il team Thömus Maxon ei sepresenta a Mustér.

Foto Jean-Luc Halter

Thömus Maxon dil possessur Ralph Näf – anteriur campion mundial da mountainbike – ei il secund meglier team da mountainbike dil mund. Per el stauschan la megliera ciclista da muntogna dil mund Alessandra

Keller sco era ils bein enconuscents sco Mathias Flückiger e Lars Forster ils pedals. Al team appartegnan denton era Chiara Solèr da Lumbrin e Vital Albin ch'ei carschius si a Tersnaus e che habitescha a Cuera. Miez mars 2025 ei igl entir team per questa stagiun da mountainbike vegnius presentaus el Catrina Resort a Mustér. Il motiv: Disentis Catrina Experience ei sponsur da quel. «Ils davos decennis ei Mustér stau ina destinaziun d'unviern. Nus lein denton era attrer a Mustér hosps duront la stad. Grazia a nies sponsoring savein nus profitar dalla savida digl entir team. Il resultat ein las investiziuns che nus havein fatg ella purschida da mountainbike ils davos onns», di Marcus Weber dil Disentis Catrina Experience. Quei partenadi seigi s'avanzaus ad in'amicezia: «Quei team ei in plascher. Alessandra Keller ei bia a Mustér, ella ei ina buna ambassadura per nus.»

Hans Huonder

Tschun damondas a Carmen Wetzel

Carmen Wetzel, Vus essas assistenta dil stab directiv e comunicaziun dalla vischnaunca da Mustér. Saveis Vus declarar da tgei funcziun che quei setracta e tgei incumbensas che Vus haveis?

Mias incumbensas ein fetg variontas. En emprema lingua sustegnel jeu nies meinafatschenta e nossa suprazonza. Seigi quei cun preparar tractandas, scriver protocols, preparar cartas e texts, documentar fatschentas e l'organisaziun d'eveniments. En collaboraziun cun nossa geraua Jris Lombris preparel jeu era las fatschentas che pertuccan fatgs da sanadad, fatgs culturalis e sustegns finanzials. Plinavon havein nus ensemen culla nova cumparsa dalla pagina d'internet era activau las medias socialas, nua ch'jeu emprovel d'orientar la populaziun aschi bein sco pusseivel davart novitads en vischnaunca. Culla nov'organisaziun hai jeu era survegniu l'incumbensa da sustener igl uffeci da baghegiar e la cumissiun da baghegiar ellas proceduras per las lubientschas e la corrispondenza cun uffecis cantunals.

Tgei qualitäts specialas basegna ei per ademplir quei pensum da lavur?

Igl ei impurtont d'haver ina buna survesta dallas diversas incumbensas fetg variontas. Sch'ins survecha a pliras partiziuns eis ei fetg impurtont da sentir co ellas lavuran ed haver ina buna comunicaziun cun ellas. Ei basegna flexibilitad sco era la habilitad da s'organisar e luvrar a moda autonoma. Clara comunicaziun en tgei direcziun che la barca duess navigar ei fetg impurtont.

Communicar bein e transparent ei oz pli che necessari. Tenor tgei criteris succeda quei tier la vischnaunca e tgei pusseivladads stattan a disposiziun?

Cul niev vestgiu dalla pagina d'internet sco era la cumparsa sin facebook ed instagram essan nus vid palpar co nus savein comunicar el futur anoviar. Comunicar clar e transparent denton era a moda semplia ei necessari.

Tgei munta comunicaziun per Vus personalmein?

Comunicaziun ei buc adina mo informar e discuorer, igl ei era impurtont da tedlar senza pregiudezis. Quei munta era tschentar cunfins persunals cun ni era senza plaids. Jeu crei ch'igl ei ina damonda da character. Ils ins capeschon fetg bia denter las lingias, auters basegnan oreifer bia plaids. Per mei eis ei in inschign d'astgar sentir tgi che drova tgei. Per quel sun jeu fetg engrazieivla.

Vus essas ina dunna giuvna. Co s'imagineis Vus Mustér en 30 onns per exempel pertuccont la comunicaziun ni era l'intelligenza artificiala?

Jeu vivel bugen egl uss e tgei che schabegia il mument.



Carmen Wetzel

Vegliadetgna: 37 onns

Stadi civil: ledia

Engaschada tier la vischnaunca da Mustér dapi ils 2 da matg 2022.

Funcziun ell'administraziun communal:

Assistenta dil stab directiv, digl uffeci da baghegiar, promoziun da cultura e comunicaziun.

Hobis: Ir a mises, ir a cuorer, cuschnar sul fiug, cantar cun Kontra.cant, scriver.

Lectura/mied preferiu: Cudischs dil fatg, tut en connex cun sanadad e providement autonom, lectura romontscha, mieds d'instrucziun.

Spisa e bubronda preferida: Selvadi, cuschnar sil fiug, bloody marry e suc da citronas frestgas.

Mia finamira persunala: Ina da mias finamiras persunalas ei da saver esser semtgada in di per la participaziun ad in «Trailrun Marathon», ina cuorsa atras la muntogna ed uauls. La pli principala ei denton d'adina puspei svegliar in fiug per novas experientschas e scuvierer habilitads zuppadas e viver il mument.

Tut quei ch'ei trend sto buc adina esser bien. Cuort e direct: Jeu senodel buc bugen cun tut ils pèschs, observel pli bugen critic e mon tenor miu agen sentiment. Ei dat segir secturs nua che l'intelligenza artificiala sa esser in bien agid. Tuttina sa ella buc surpender tuttas lavurs. Il carstgaun drova igl interagir cun auters concarstgauns sco era la cuminonza. Principal ei che viver ella cuminonza vegni entras tut l'intelligenza artificiala buc a pitir aunc pli fetg. Ni che nus stuein in di dumandar ChatGpt sco ins nua si ils calzers.

Intervista Hans Huonder

Restar viscals ella vegliadetgna

Igl onn 1960 ha il capitani dalla Cumpignia da mats Mustér clamau interessents per fundar in'uniun da gimnastica e sport. 29 interessai ein separticipai a quella radunonza. Ella gliesta dils presents figuravan quater representants dalla baselgia e claustra ed il president communal. Il president dall'Uniun sportiva catolica cantunala e svizra (SKTSV), signur Schuder, ha presentau gl'intent d'ina uniun sportiva.

Igl emprem statut dall'Uniun da gimnastica Mustér datescha digl onn 1961. L'uniun vegn fundada sco com-membra dall'Organisaziun cantunala e svizra da gimnastica e sport per catolics. Patrun dall'uniun ei s. Gion Battesta.

El decuors dils onns vegn il num dall'uniun midaus en Uniun da gimnastica Mustér e contuorn (UGM). L'uniun ei politicamein e da confessiun neutrala. Ella ha l'intenziun da cultivar las forzas corporalas sco era d'activar la collegialitad dils commembers.

Oz dumbra l'uniun 29 commembers activs, nov commembers passivs e diesch commembers d'honor. Ils commembers activs s'entaupan naven dil settember entochen Pastgas mintga gliendisdis sera el Center Fontauna e fan gimnastica en duas gruppas, seniors giuvens e seniors 60+. La gruppa da seniors giuvens ha la pusseivladad da far gimnastica pli activa che corispunda allas forzas e vitalitad dils umens giuvens. La

Uniun da gimnastica Mustér e contuorn

Suprastonza

President:	Gion Battesta Manetsch
Cassier:	Walter Deflorin
Actuar:	Daniel Job

Trenaders

Seniors 60+:	Paul Duff
Seniors giuvens:	Damian Deflorin

gruppa da seniors 60+ cultivescha in'activitad pli ruas-seivla. Tier la gimnastica s'audan era giugs, ils quals promovan la concentrasiun, agilitad e coordinasiun. Tiels giugs unihoc, ballareit ni ballapugn s'auda la lutga in encunter l'auter ed il plascher da gudignar ni il frust da spiarder denton adina cun ver spért sportiv.

Suenter l'activitad sportiva s'entaupan ils umens alla meisa rodonda tier l'Onda Gada nua ch'els san brattar e schar reviver temas dil mintgadi. Sco president e commember activ lessel jeu animar in e scadin da sededicar al sport che dat vitalitad a tgierp ed olma. L'Uniun da gimnastica Mustér e contuorn ei aviarta per mintga interressent.

Uniun da gimnastica Mustér e contuorn



Sport dat vitalitad a tgierp ed olma. Fotos Uniun da gimnastica Mustér e contuorn

Avon 100 onns

Occasiun

Prima tardens à fr. 1.50 il toc
Traders p. lenn (Schneckenbohrer)
da 20 mm. ensi per 1.80—3. fr.
il toc.

**Ernst Huonder fegls
Mustér. Telefon 29.**

Encuretg de prender si

per il «Disentiserhof» entginas

bunas vaccas de latg

per la proxima stad.

De s'adressar tier

**Placi Friberg ne
Gion Bat. Levy, Mustér.**

Encuretg de prender si

in miez dretg de piertg
dell' alp Russein.

Gion Bat. Levy, Disla.

Negozi de biestga.

Silla fiera de **Mustér** dils 8 d. q. ei stau catschau ca. 20
tgaus biestga. En preschientscha de paucs marcadonts ei ve-
gni vendiu mo zaconts tiers de nez per 9—1200 frs. Ei para
ch' ins stoppi quintar cun ina pintga sbassada dils prezis, es-
send ch' il prézi de latg ei ella bassa tschessaus per 1—2 cts.
il liter. M.

Per pescadurs.

Nus cumprein adina
scadin quantum

Forellas

vivas per ils pli aults prezis
currents. Adattai apparats de
oxigen stattan en disposiziun
per il transport. (P597Ch)

Hermann & Wyss
vivon Ths. Domenig, S.-A.
Cuera. Tel. Nr. 38. 2 1

Annunzia e recommendaziun.

La suttascretta familia ha dapi ils 15 cort. surpriu la

Fatschenta de far limonadas

de sgr. Gion Ant. Cathomas, Mustér.

Ella serecammonda a tutta clientella de sgr. Cathomas e
vegn a sespruar de survir quella sco siu antecessur ha fatg
quei durent biars onns.

Cun perfetga stema:

Familia Andreoli-Monn, Mustér.

Hotel

„Disentiserhof“

Mustér

Ils bogns de Radium
ein aviarts.

Constatau medicinalmein
gronds success encunter rheu-
matismus, ischias etc.

Avon e suenter la sesiun
principala prezis reduci.

Fl. Taor, propr.

— **Scola claustrala Mustér.** Cun s. Placi conclu-
da la scola claustrala a Mustér siu onn scolastic 1924/25.
Il 44 avel rapport annual lai sminar la gronda lavur
ch' ei puspei veguida prestada dals 20 professers e 118
scolars claustrals. Ella gimnastica e vid il clavier ein ils
studiosus era aunc vegni instrui da 2 forzas laicas. Dals
118 scolars han 89 frequentau il gimnasi (6 classas) e
29 las realas (2 classas) 83 fuvan egl internat, 35 egl
externat. Buca meins che 67 scolars ein grischuns, 66
ein de lungatg tubestg, 50 romontschs e 2 de lungatg
talian. Las duas academias „Scolastica“ e „Curtin“ sut
protectorat de rev. pader decan, P. Maurus, han sco usi-
tau giu biaras, bialas ed instructivas uras cun lavur en
prosa e poesia. Possi la scola claustrala flurir grazia alla
comprovada premura dils vegls e las novas forzas dils
giuvens conventuals!

Occurrenzaz

Venderdis, igl 1. d'uost 2025

Fiasta naziunala, organisada dalla vischnaunca ensemen cul TCS, naven dallas 15.00 a Fontanivas.

Sonda e dumengia, ils 12 e 13 da settember 2025

Uniun da dunnas: Fiera da resti d'affons en halla Cons.

Sonda, 13 da settember 2025

Allas 19.30 uras concert d'arpa da Daniela Lorenz ella baselgia da s. Placi. Entrada libra, collecta. Suentar il concert che cuoza rodund in'ura vegn purschiu in pign apero avon baselgia. Organisaziun La Culturella.

Dumengia, 7 da december 2025

Uniun da dunnas: Sontgaclau per senioras e seniors en halla Cons.

Mardis, 9 da december 2025

Uniun da dunnas: Solver Rorate en halla Cons.

Indicaziuns pil calender d'occurrenzaz:

Las indicaziuns pil calender d'occurrenzaz san vegnir tarmessas a: cultura@disentis.ch

«Art cun ed ella natira»

Ils proxims tschun onns ein da veser siat ovras d'art per liung dalla senda da viandar che meina dil Center Fontauna, sur La Pendentia entochen sur Mumpé Medel. Ellas ein da Manuela Fischer, l'anteriura guardiacamona dalla camona da Cavardiras.

La graficra Manuela Fischer che viva alternont a Winterthur e Mustér muossa siu project che porta il tetel «RaumzeitTraum». La lavur ei stada exponida sil glatscher dil Brunni, buca lunsch naven dalla camona da Cavardiras ch'ella ha menau 36 onns. «Igl ei in project davart la simbiosi da natira, scienza ed art. El envida il contemplader da reflectar», di Manuela Fischer. Las siat ovras ha ella dessignau e concepiu, la realisaziun ei succedida en in team. Luvrau ha il team cun differents materials sco lenn, metal, arschella ni era materia artificia.

Ovras animeschan da reflectar

In'emprema impressiun da siu art retscheiva il viandont gia tier l'emprema ovra che sesanfla ella gassa – la senda da viandar en direcziun baselgia da s. Gada – gest suenter il binari dalla Viafier Matterhorn Gottard. En dus spiaghels piazzai in visavi l'auter sereflectescha il viandont pliras ga. Gia leu semuossa la simbiosi digl art culla natira. Quei emprem exponat porta il tetel «Infinitad/Unendlichkeit». La davosa lavur da quella retscha sesanfla sper la senda da viandar sur Mumpé Medel. Ina meisa cun pusada che penda vid quella duei animar da sedumandar: Tgei succeda sch'ils glatschers ed ils nibels furneschan negin'aua pli? Il project secumpona da siat ovras: «La cefra siat simbolisescha la perfecziun en biaras culturas.» Tuttas ovras ein enramadas. Era quell'atgnadad per ovras el liber ha sia muntada per Manuela Fischer: «Enteifer quella ei buca mo igl art, mobein era la natira dil contuorn da veser.»



Manuela Fischer sper La Pendentia a S. Gada e la tiarza staziun da siu project: «Tgei vesas Ti cun Tes dus eglis?»

Foto Hans Huonder

Da mintga vart da La Pendentia

Las siat staziuns cun art da Manuela Fischer sesanflan sil tschancun dalla senda che meina dil Center Fontauna a S. Gada sur La Pendentia entochen sur Mumpé Medel. Da leu sa il viandont serender en direcziun Stagias, Mutschnengia ni Cavorgia. Il project d'art fa aschia era attractiva la spassegiada sur La Pendentia. Quella ei vegnida surdada ufficialmein a siu intent il november vargau. La punt che colligia S. Gada cun Mumpé Medel ei cun rodund 270 meters lunghezia la pli liunga punt pendentia el cantun Grischun. Spectaculara ei l'altezia che contonscha el miez dalla punt rodund 100 meters differenza tiel Rein Anterior.

Hans Huonder

Naschientschas e mortoris

Naschientschas

Ray Gabriel Blumenthal, naschius ils 10 da mars 2025, fegl da Justina e Thomas Blumenthal.

Sofia Gomes Araújo, naschida ils 12 da mars 2025, feglia d'Alda Daniela da Silva Gomes e José António Oliveira de Araújo.

Mirco Huonder, naschius ils 8 d'avrel 2025, fegl da Michaela ed Adrian Huonder.

Dario Lombris, naschius ils 12 d'avrel 2025, fegl da Gianna e Pirmin Lombris.

Toni Deplazes, naschius ils 18 d'avrel 2025, fegl da Sabrina e Marc Deplazes.

Arlo Amaro Maissen, naschius ils 2 da matg 2025, fegl d'Olivia ed Urban Maissen.

Kimmy Monn, naschida ils 15 da matg 2025, feglia da Jessica e Raffael Monn.

Mortoris

Monica Decurtins-Caminada, naschida ils 23 da zercladur 1940, morta ils 16 da mars 2025.

Rosa Catrina Riedi-Riedi, naschida ils 20 da fevrer 1945, morta ils 17 da mars 2025.

Rico Flury-Valier, naschius ils 25 da november 1937, morts ils 9 d'avrel 2025.

David Johannes Pius Condrau, naschius ils 16 da mars 1981, morts igl 1. da matg 2025.

Karin Friz-Katzprowitz, naschida ils 7 da schaner 1947, morta ils 4 da matg 2025.

Alexandra Condrau-Hendry, naschida ils 14 da december 1931, morta ils 18 da matg 2025.

Laurenzia Gadola, naschida ils 17 da fenadur 1940, morta ils 21 da matg 2025.

Nos giubilar

La vischnaunca ha saviu gratular a dus giubilar sin natalezi en aulta vegliadetgna.



Sur Pius Wenzin, naschius igl 1. da zercladur 1930, 95 onns.



Maria Schnoz-Pally, naschida ils 4 da matg 1935, 90 onns.

Fin da redacziun dallas proximas ediziuns dil Detg Denter Nus

Las proximas ediziuns dil Detg Denter Nus cumpanan suandontamein:

30 da settember 2025 (fin da redacziun 22-08-2025)

18 da december 2025 (fin da redacziun 14-11-2025)

A societads ed uniuns vegn purschii la pusseivladad da publicar rapports da lur arranschaments el Detg Denter Nus. Las contribuziuns ston vegnir furnidas per romontsch, las fotografias ston esser da buna qualitad. Ils termins dalla fin da redacziun ein indicai sura. detgdenternus@disentis.ch

Pusseivladad da plazzar reclamas el Detg Denter Nus

La vischnaunca da Disentis/Mustér sco purtadra ed editura dil Detg Denter Nus porscha allas interpresas indigenas la pusseivladad da plazzar reclamas el Detg Denter Nus. Quellas ston vegnir tarmessas per mail (detgdenternus@disentis.ch) mintgamai entochen la fin da redacziun (mira proximas ediziuns). Ei vegn acceptau sulettamein documents finì cumpleinamein, vul dir tals che pretendan buca aunc lavur da grafica e correctorat.

Grondezias pusseivlas:

1/3 pagina	180 mm lad	78 mm ault	200.–
1/2 pagina	180 mm lad	118 mm ault	400.–
1 pagina	180 mm lad	238 mm ault	600.–

Administraziun communal

Via Cons 2
Caum postal 57
7180 Disentis/Mustér



T 081 920 36 36
admin@disentis.ch
www.disentis.ch